

DOMINGU XXI TEMPU KOMÚN – TINAN B

Tema

Liturjia domingu da-21 Tempu Komún nian ko’alia mai ita kona-ba opsaun/hilin sira. Nia fó hanoin mai ita katak ita-nia ezisténsia bele gasta atu halai tuir valór efémeru no fuan-laek sira, ka uza atu manán valór eternu sira ne’ebé lori ba moris definitivu, ba realizasaun nakonu.

Ema ida-idak, mane no feto, loroloron tenke halo ninia hilin.

Iha *leitura dahuluk*, Josué tene tribu sira Israel nian halibur iha Sikém atu hili entre “serví Na’i” no serví maromak seluk. Povu, naturalmente, hili atu “serví Na’i”, basá nia haree iha istória libertasaun husi Ejitu no la’o-dalan iha iha rai-fuik maran, oinsá Jahwéh de’it bele haraik ba nia Povu vida, liberdade, moris-di’ak no dame.

Evanjellu koloka iha ita-nia oin grupu rua dixípulu sira-nian, ho opsaun lahanesan hasoru Jezús nia proposta. Grupu ida, kesi an ba lójika mundu nian, soi nu’udar prioridade soin materiál sira, podér, ambiisaun no glória; tanba ne’e, sira hakribi Jezús nia proposta. Grupu seluk, nakloke ba Maromak no Espíritu nia asaun, sai disponivel atu tuir Jezús iha dalan domin no saran-an moris nian; membru sira grupu ne’e nian hatene katak Jezús de’it mak iha liafuan moris rohan-laek nian. Grupu dahikus ne’e maka *Evanjellu* propoin nu’udar modelu ba fiar-na’in sira tempu hotu nian.

Iha *leitura daruak*, Paulo dehan ba sarani sira Éfeso nian katak opsaun ba Kristu iha konsekuénsia mós iha nivel relasaun familiár. Ba maktuir Jezús nian, espasu relasaun familiár maka tenke sai fatin iha-ne’ebé manifesta valór sira Jezús nian, valór sira Reiu nian. Ho ninia komuñaun moris nian, ho ninia uniaun, ho ninia partilla domin nian, kazál sarani simu bolun atu sai sinál no reflesu uniaun Kristu nian ho ninia Kreda.

LEITURA I – Jos 24,1-2a.15-17.18b

AMBIENTE

Livru Josué nian (ne’ebé ita-nia leitura dahuluk hola parte bá) hakohak parte ida sékulu XII mK, husi époka tribu sira Maromak nia Povu ne’ebé sai husi Ejitu, sira-nia entrada iha Rai Promesa nian, to’o Josué nia mate. Livru oferece mai ita vizaun simples liu okupasaun Kanaan nian: tribu sanulu-resin-rua hamutuk, iha lideransa Josué nia okos, realiza spedisaun militár no foti ba sira, kuaze lahó opozisaun, territóriu tomak husi kananeu sira nia liaman... Tuir istória, loloos la’ós fasil nune’e, nein ho forma lineár: buat ne’ebé loos liu maka versaun ne’ebé Livru Juiz sira nian apresenta no ko’alia kona-ba konkista ida neineik no difisil (kf. Jz 1), lakompletu (kf. Jz 13,1-6; 17,12-16), ne’ebé la’ós obra povu ida iha unidade haleu xefe ida mesak, maibé katak tribu sira halo funu keta-ketak.

Livru Josué nian, molok sai livru istória nian ida, nia maka livru ida katekeze nian. Objetivu autór deuteronomista sira ne’ebé hakerek livru ne’e maka destaka kbiit maka’as Jahwéh nian, kbiit uza atu serví niia Povu: Maromak (no la’ós kapasidade militár tribu sira nian) mak, ho ninia beran boot, oferece Rai Promesa nian ba Israel; ba Povu natón de’it simu Maromak nia prezente sira no hatán ho fidelidade ba Aliansa no ukun-fuan sira.

Testu ne’ebé ohin propoin mai ita, lori ita ba faze finál Josué nia moris nian. Sente hakbesik daudaun ba mate, Josué halibur iha Sikém líder sira tribu oioin Maromak nia Povu nian no propoin ba sira renovasaun ida ba sira-nia compromisu ho Jahwéh. Tuir Jos 24,15, Josué

koloka sasán sira tuir forma ne'e: "imi hili ohin sé mak imi hakarak serví ... tanba ha'u no ha'u-nia uma-laran ami serví Na'i".

Iha versaun autór deuteronomista nian, parese Josué dirije liafuan sira ba grupu ida tribu siranian ne'ebé partilla fiar komún iha Jahwéh. Iha ita-nia oin hamriik asembleia ida ne'ebé halibur "tribu sanulu-resin-rua" ne'ebé ikus mai (iha David nia époka) sei konstituti unidade nacionál? Biblista rumá hanoin katak lae. Entre tribu sira ne'ebé iha, bele iha serteza katak iha tribu Judá nian, basá kontaktu entre Judá no "uma-kain José nian" estabelese de'it iha liurai David nia tempu. Josué nia "uma-kain" ne'ebé testu refere maka tribu sira husi parte centrál – Efraim, Benjamim no Manassés – ne'ebé kleur ona mak adere ba Jahwéh no ba Aliansa. No tribu seluk, ne'ebé hetan konvite atu kompromete an ho Jahwéh mak sira ne'ebé loos? Provavelmente, konvita atu hili entre "Na'i" no maromak seluk (kf. Jos 24,14) dirije ba tribu sira parte tasi-feto nian, ne'ebé, dúvida-laek, la husik Palestina husi kendas époka patriarka sira-nian (nune'e, la moris esperiénsia Ejitu nian, no la halo mós esperiénsia enkontru nian ho Jahwéh, Maromak libertadór).

Karik "asembleia iha Sikém" refere iha Jos 24 maka tentativa istórica dahuluk atu estabelese ligasaun tribu sira sentru Palestina nian (Efraim, Benjamim no Manassés – tribu sira ne'ebé moris esperiénsia Ejitu nian, libertasaun nian, la'o-rai iha rai-fuik maran no Aliansa ho Jahwéh) no tribu sira tasi-feto nian (Issacar, Zabulón, Neftali, Asher no Dan – tribu sira ne'ebé nunka ba Ejitu). Tali ne'ebé liga sira maka fiar komún iha Maromak ida de'it. Maski nune'e, uniaun entre tribu sira tasi-feto no sentru nian, la akontese dala ida de'it; maibé dalan progr4sivu ida, ne'ebé completa de'it tempu barak liutiha Josué nia époka.

Pontudepartida ba testu ne'ebé propoin mai ita mak faktu istóriku. Maski nune'e, autór deuteronomista responsavel ba testu ne'e foti notísia istórica ida-ne'e no nakfilak nia ba katekeze ida kona-ba kompromisu ne'ebé Israel assume ho Jahwéh. Ninja objetivu maka konvida israelita sira ninia époka nian (séku lu. VII mK) atu keta husik maromak seluk ema amoreu no kananeu nian babeur sira no mantein fiél ba Aliansa.

MENSAJEN

Iha interpelasaun ne'ebé dirije ba tribu sira Josué hahú atu halo lista momentu importante rumá istória salvasaun nian, hodi hatudu ba Povu oinsá Jahwéh maka Maromak ida ne'ebé bele konfia; ninia hahalok salvasuan nian no libertasaun nian mak prova boot ba ninia kbiit no fidelidade ba Israel (kf. Jos 24,2-13).

Hotu tiha introdusaun ne'e, Josué konvida reprezentante sira husi tribu ne'ebé marka prezensa atu hasai konsekuénisa sira no halo sira-nia opsaun. Presiza hili entre serví Na'i ne'ebé liberta Israael husi opresaun, ne'ebé gia nia liuhusi rai-fuik maran lori nia tama iha Rai Promesa nian, ka serví maromak sira povu kananeu ka amoreu ka seluk nian. Josué no ninia família hili tiha ona: serví Jahwéh (vers. 15).

Ita bele hein Povu nia resposta. Hotu-hotu hatudu intensaun atu serví Na'i, nu'udar resposta ba Ninja asaun libertadora no protesaun durante dalan naruk iha rai-fuik maran (vers. 16-18). Israel kompromete an atu husik maromak seluk no halo Jahwéh ninia Maromak. Aseitasuan Jahwéh nian nu'udar Maromak Israel nian, la'ós buat rumá ne'ebé impoin ba sira hanesan grupu ida atan sira nian, maibé nu'udar opsaun livre, ne'ebé ema sira ne'ebé halo espeiénsia enkontru nian ho Maromak hili no sira hatene katak iha ne'e maka sira-nia realizasaun no ksolok. Halo tiha dalan ho Jahwéh iha istória, Israel haree, lahó dúvida, katak iha Maromak de'it maka bele hetan liberdade no moris iha plenitude.

ATUALIZASAUN

- Problema fundamental ne’ebé autór hatudu iha ita-nia testu maka opsaun nian: “Imi hili ohin sé mak imi hakarak serví” –Josué dehan ba Povu halibur hamutuk. Ne’e kestaun ida ne’ebé nunka hotu... Durante ita-nia dalan moris nian, ita halo esperiénsia enkontru nian ho Maromak libertadór no maksoin ne’ebé Israel deskobre iha ninia marxa iha istória; maibé ita mós, dala barak hasoru ho maromak seluk no proposta sira ne’ebé parese garante vida, ézitu, realizasaun, ksolok no, kuaze sempre lori ita ba dalan sira moris-atan nian, dependénsia nian, deziluzaun nian, ksolok-laek nian. Espresaun “imi hili ohin sé mak imi hakarak serví” interpela ita kona-ba ita nia moris-atan ba osan, ba ézitu, ba fama, ba kbiit, ba moda, ba ezijénsia no valór sira ne’ebé opiniaun pública konsagra, ba rekoñesimentu público... Naturalmente, la’ós katak valór sira hotu mundu nian hahoris moris-atan ka inkompativele ho ita-nia opsaun ba Maromak... Ita presiza reflete nafatin kona-ba ita-nia opsaun sira, atu keta halai tuir maromak falsu sira no husik atu realizasaun no ksolok falsu sira babeur ita. Fiar-na’in ne’ebé loos hatene katak nia labele moris lahó Maromak no ninia proposta sira; nia hatene katak Maromak ne’e nunka dezilude sira ne’ebé konfia iha Nia no sei hetan realizasaun nakonu ba sira-nia moris.
- Israel aseita atu “serví Na’i” no kompromete an ho Nia, la’ós tanba obrigasaun, maibé konviksaun katak ida-ne’e maka dalan ba ninia ksolok. Dala ruma ema haree Maromak hanesan ninia konkorrente no ninia ukun-fuan sira nu’udar proposta ida ne’ebé limita ninia liberdade no independénsia... Loloos, kompromisu ho Maromak no aseitasaun ba niia proposta sira la’ós dalan ida moris-atan nian, maibé dalan ida ne’ebé lori ba liberdade no realizasaun nakonu. Dalan ne’ebé Maromak propoin mai ita – dalan ne’ebé ita livre atu aseita ka lae – maka dalan ida ne’ebé liberta ita husi egoízmu, loko-an, autosufisiénsia, moris-atan ba soin materiál no projeta ita ba domin, ba partilla, ba servisu, ba don moris nian, ba ksolok loos.
- Josué, líder comunidade Maromak nia Povu nian, iha papél fundamental iha sentidu atu interpela Povu no fó sasin kona-ba nia opsaun ba Maromak. La’ós líder ida ne’ebé hateten liafuan furak no apresenta proposta kmanek, maibé hafoin la moris tuir... Nia mak líder ne’ebé kompromete an tomak ho Maromak no testemuña, ho moris rasik, opsaun ne’e. Josué bele sai exemplu ida ba sira hotu ne’ebé iha responsabilidade atu già comunidade Maromak nia Povu iha nia marxa iha istória. Ninia exemplu konvida sira ne’ebé prezide comunidade Maromak nia Povu nian atu sai Maromak nia lian ne’ebé interpela no kestiona sira ne’ebé la’o iha nia sorin; no konvida mós responsavel sira comunidade sarani nian atu testemuña ho moris rasik buat ne’ebé sira hanorin ba Povu.

SALMU RESPONSORIÁL – Salmu 33 (34)

LEITURA II – Ef 5,21-32

AMBIENTE

Ita kontinua lee parte morál no ezortasaun nian husi Surat ba Eféziu sira (kf. Ef 4,1-6,20). Iha parte ne’e, Paulo fó hanoin ba sarani sira ne’ebé halo opsaun iha loron sira-nia Batizmu nian no obriga sira atu moris nu’udar Ema Foun, tuir Jezús nia ilas.

Vida Ema Foun nian ne’ebé husik ona nakukun no hjili naroman tenke tradús ba atitude konkreta. Tanba ne’e, Paulo haktuir, iha momentu ida ninia reflesaun nian, konjuntu ida norma sira komportamentu nian, ne’ebé liuhusi norma sira ne’e hatudu opsaun ne’ebé fiarna’in assume iha nia loron Batizmu nian.

Iha sesaun Ef 5,21-6,9 nian (ne'ebé ita-nia testu ohin hola parte bá), Paulo apresenta norma sira ne'ebé tenke tahan relasaun familiár sira. Ho forma espesiál, Paulo refere ba devér sira kabén-na'in sira-nian, tanba nia haree iha sira nia uniaun ilas Kristu nia uniaun ho nia Kreda. Ne'e maka tema importante ida teolojia nian ne'ebé dezenvolve iha Surat ba Eféziu sira.

MENSAJEN

Ita-nia testu hahú ho prinsípiu jerál ne'ebé tenke regula relasaun sira entre membru oioin família sarani nian: “imi buka haraik an ba malu tan hamta’uk Kristu” (Ef 5,21). Iha “submisaun” ne'e hatudu ema ida nia kondisaun ne'ebé nafatin iha atitude simples no haraikan nian, hodi la husik atu niia relasaun ho maluk sira, loko-an maka domina ka marka ho prepoténsia. Espresaun “tan hamta’uk Kristu” fó hanoin ba fiar-na'in sira katak Kristu domin nian, Kristu servisu nian, Kristu partilla nian maka exemplu no modelu ne'ebé sira tenke tau nafatin iha oin.

Hafoin, Paulo dirije ba membru sira família nian no propoin norma konkreta konduta nian. Testu ne'ebé propoin mai ita, refere de'it ba relasaun entre kabén-na'in sira (iha kontinuasaun Paulo ko'alia mós kona-ba oan sira nia komportamentu ho inan-aman sira, patraun sira ho atan sira no atan sira ho patraun sira –kf. Ef 6,1-9).

Ba feen sira, Paulo husu submisaun ba la'en sira, basá “la'en maka feto nia ulun, hanesan Kristu maka kreda nia ulun, nia isin-lolon” (vers. 23). Afirmasaun ida-ne'e – tuir ita-nia sensibilidade no eskema mentál modernu parese diskriminasaun ida – maibé tenke komprende nia iha kontestu sósiu-kuturál époka ne'ebá nian, iha-ne'ebé mane maka referénsia aas liu iha organizasaun núkleu familiár. Submisaun ne'ebé Paulo hateten presiza komprende iha sentidu domin no servisu nian no la'ós iha sentidu moris-atan nian.

Ba la'en sira, Paulo rekomenda atu hadomi sira-nia kabén, “nu’udar Kristu hadomi Kreda no saran An ba nia” (vers. 25). Ida-ne'e la'ós domin naran de'it, maibé domin ida hanesan Kristu nian ba komunidade – katak, domin laran-luak no totál, ho kapasidade atu to'o iha saran moris rasik. Ba Paulo, la'en sira nia domin ba feen sira tenke sai domin ida ne'ebé hamamuk an husi sinál naran de'it egoízmu nian no prepoténsia nian, no tenke sai domin ida atensaun lais nian, ne'ebé manifesta iha atitude laran-luak nian, bondade nian no servisu nian, ne'ebé sai don totál ba ema ne'ebé nia hadomi.

Iha kontestu ne'e, Paulo dezenvolve ninia teolojia relasaun nian entre Kristu no Kreda, atu hafoin hasai konsekuénsia sira ba kabén-na'in sarani sira nia uniaun... Kristu santifica Kreda, purifika nia “iha bee batizmu nian no liafuan moris nian” (vers. 26). Konserteza iha aluzaun ida ba batizmu sarani (ne'ebé hetan inspirasaun husi serimónia preparatória ba kazamento batizmu sarani, husu noiva atu hariis/luku molok apresenta an ba noivu), husi ne'ebé Kristu harii ninia komunidade no hamoos nia husi salan. Batizmu maka momentu iha-ne'ebé kristu oferece moris nakonu ba Kreda no iha-ne'ebé kompromete an ho Kristu iha komunidade ida domin nian. Husi momentu ida-ne'e, Kristu no Kreda forma isin-lolon ida de'it... Hanesan Kristu no Kreda forma isin-lolon ida de'it, nune'e la'en no feen, kompromete an iha komunidade ida domin nian, forma isin ida de'it: “tan ne'e mane sei husik nia aman-inan atu hamutuk ho nia feen: sira na'in rua sai duni isin-lolon ida de'it” (vers. 31). Espresaun “isin ida de'it” ne'ebé Paulo uza iha ne'e, la allude de'it ba uniaun isin nian, maibé moris kazál tomak, halo iha empeñu loroloron nian hodi moris iha domin, iha fidelidade no iha partilla ezisténsia tomak nian.

Paralelizmu ne'ebé Paulo estabelese entre Kristu nia uniaun no Kreda no domin ne'ebé kesi kabén-na'in sira fó signifikadu espesiál ba kazamento sarani; yokasaun kabén-na'in sira nian mak haklaken no testemuña, ho sira nia domin no sira nia uniaun, Kristu nia domin ba Kreda. Ho liafuan seluk: uniaun kabén-nai'in sarani sira-nian tenke sai, ba mundu nia matan, sinál no reflesu ida kona-ba “mistériu” domin nian ne'ebé kesi Kristu ho Kreda.

ALELUIA – kf. Jo 6,63c.68c

EVANJELLU – Jo 6,60-69

AMBIENTE

Ita iha ona parte ikus epizódiu multiplikasuan paun no ikan sira-nian (kf. Jo 6,1-15) ne’ebé kontinua ho “diskursu paun moris nian” (kf. Jo 6,22-59). Iha epizódiu ne’e ita haree ema sira ne’ebé rona manifesta konfuzaua...sira hein mesias liurai ida ne’ebé fó ba sira mori di’ak no paun naresin no Jezús hatudu katak nia la mai atu “fó buat sira ne’e”, maibé oferese An rasik atu umanidade hetan moris; ema lubun boot hein husi Jezús proposta umana ida triunfu no glória nian no Jezús konvida sira atu identifika ho Nia no tuir Nia iha dalan domin no saran an nian to’o mate... Jezús nia interlokkutór sira komprende katak Jezús tau sira iha opsaun fundamental nia oin: moris tuir lójika umana ne’ebé buka soin materiál no satisfasaun imediata, ka asume lójika Maromak nian, hodi tuir Jezús nia exemplu no halo moris sai don ida domin nian atu fahe ho ema seluk. Metin iha sira-nia eskema no prekonseitu sira, no hakohak metin sira-nia aspirasaun no mehi ne’ebé materialista liu, ho deziluzaun kona-ba programa ida ne’ebé ba sira lori de’it ba frakasu, Jezús nia interlokutór sira lakohi atu identifika an ho Nia no ho Ninia programa.

Ita-nia testu hatudu “eskolante barak” nia reasaun negativa ba proposta sira ne’ebé Jezús halo. La’ós katak eskolante hotu hakarak atu identifika an ho Jezús (“han nia isin no hemu nia raan”) no oferese nia moris nu’udar karan domin nian atu fahe ho umanidade tomak. Ita tenke hatuur “katekeze” ida-ne’e iha kontestu komunidade João nian, iha sékulu I nia rohan... Komunidade sarani hetan diskriminasaun no persegisaun; eskolante barak hadook an no tuir fali dalan seluk, hodi lakohi tuir Jezús iha dalan doasaun nian. Sarani barak, iha konfuzaua no deziluzaun, husu: atu sai sarani presiza halo dalan ida radikál nune’e no ho eziénsia maka’as? Jezús nia proposa, maka efetivamente, dalan ida moris nakonu nian ka dalan ida frakasu no mate nian? Ba lia-husun sira-ne’e maka “katekista” João buka atu hatán.

MENSAJEN

Pasajen fahe ba parte rua. Parte dahuluk (vers. 60-66) haktuir grupu ekolante ida sira-nia protestu hasoru Jezús nia esjizénsia sira; ida daruak (vers. 67-69) apresenta sira na’in Sanulu-resin-rua nia resposta ba Jezús nia proposta. Grupu rua ne’e reprezenta atitude lahanesan hasoru Jezús no ninia proposta sira.

Ba “eskolante” sira iha parte dahuluk testu nian, sira konsidera Jezús nia proposta admite-laek, demais liu ba kbiit umanu (vers. 60). Sira la dispostu atu haluha sira nia projetu rasik ambisaun no realizasaun umana nian, atu tuir Jezús iha dalan domin no entrega nian, atu halo moris rasik servisu ida no partilla ida ho maun-alun sira. Aleinde todan, ba sira dalan ne’e lójika-laek. Konfronta ho radikalidade iha dalan Reinu nian, sira lakohi foti risku. Iha ninia lia-hatán ba “eskolante” sira-ne’e nia objesaun, Jezús asegura katak dalan ne’ebé nia propoin la’ós dalan frakasu nian no mate nian, maibé dalan ida ho destinu ba glória no moris rohan-laek. Mane Maksoin ninia “sa’e” ba Lalehan liutiha nia mate iha krús, maka “prova ne’ebé hatudu katak moris ne’ebé saran tanba domin lori ba vida nakonu (vers. 61-62). “Eskolante” sira-ne’e tanba hanoin tuir lójika umana, lójika isin nian, lakohi simu Jezús nia proposta; Espíritu de’it maka habiit fiar-na’in sira atu komprende Jezús nia lójika, adere ba ninia proposta no tuir Jezús iha dalan domin nian no doasaun nian ne’ebé loris ba moris (vers. 63).

Loloos, eskolante sira-ne'e tuir Jezús ho razaun sala (glória, kbiit, hetan satisfasaun fasil ba nesesidade bázika sira). Adezaun ba Jezús husi li'ur no superfisiál de'it. Jezús konxiente kona-ba realidade ne'e. Nia hatene katak "eskolante" ida sei fa'an nia no saran nia ba líder judaiku sira; nia apresenta de'it proposta – proposta radikál no ezijente – no hein katak "eskolante" halo ninia opsaun, ho liberdade tomak.

Vida foun ne'ebé Jezús propoin maka presente ida Maromak nian. Oferese ba ema hotu (vers. 65). Ba Maromak nia konvite ema livre. Se ema taka an ba Aman nia hahalok no lakohi Maromak nia prezente sira, nia labele integra an iha komunidade eskolante sira nian no tuir Jezús.

Parte dahuluk taka ho eskolante barak ninia hakiduk husi dalan tatur Jezús nian" (vers. 66). Eskolante sira-ne'e la simu Jezús nia programa ne'ebé ezije hakribi lójika umana ambisaun nian no realizasuan pesoál... Sira la disponivel atu tuir Jezús nia dalan.

Konfirma tiha desersaun "eskolante" sira-ne'e nian, Jezús husu na grupu ki'ik "Sanulu-resin-rua" nian atu halo sira nia hilin: "imi mós hakarak bá ona?" (vers. 67). Ita bele repara katak Jezús la hakman ninia ezijénsia sira, ka hamamar ninia liafua sira... Nia prontu atu foti risku no lakon eskolante sira, maibé la dispostu atu sees husi ninia projetu nia radikalidade. Ne'e tanba Nia seguru kona-ba dalan ne'ebé Nia propoin – dalan domin nian, servisu nian, partilla nian, saran-an nian – dalan mesak atu bele to'o ba moris nakonu... Tanba ne'e maka Nia labele muda vírgula ida iha ninia diskursu no proposta. Jezús esplika didi'ak ona dalan ba moris plenitude nian; agora "eskolante" sira maka tenke deside atu aseita ka rejeita nia. Konfronta ho opsaun fundamental ida-ne'e, sira na'in "Sanulu-resin-rua" define momoos dalan ne'ebé sira hakarak tuir: sira aseita Jezús nia proposta, aseita atu tuir Nia iha dalan domin no saran-an nian. Ida-ne'ebé hatán iha grupu nia naran maka Simão Pedro: "Na'i, ami atu bá loos sé? Ita mak iha liafuan moris rohan-laek nian!" (vers. 68). Komunidade rekoñese, liuhusi Pedro nia lian, katak iha de'it Jezús nia dalan maka bele hetan moris definitivu. Dalan seluseluk lori de'it moris efémeru no parsiál, no dala barak lori ba moris-atan no mate; iha de'it dalan ne'ebé Jezús propoin maka ita hetan ksolok ba nafatin no realizasaun nakonu (vers. 68).

Hodi rekoese Jezús nu'udar dalan mesak válido atu to'o iha moris rohan-laek maka komunidade na'in "Sanulu-resin-rua" nian adere ba Ninia proposta ("ami fiar" – vers. 69a). "Fiar" (adezaun ba Jezús) tradús iha tatur Kristu nian, iha identifikasiān ho Nia, iha kompromisu ho proposta ne'ebé Nia halo ("han nia isin no hemu nia raan ba moris rohan-laek").

Resposta iha Pedro nia ibun maka resposta ne'ebé komunidade João nian (komunidade ne'e moris sira-nia fiar iha kondisaun difisil no, dala barak tenke hakribi lójika mundu nian no fiar iha radikalidade Evanjellu Jezús nian) simu konvite atu fó: Na'i, ita-nia proposta sira la halo sentidu iha roman valór sira mundu nian; maibé ami seguru katak dalan ne'ebé Ita hatudu mai ami maka dalan ne'ebé lori ba moris rohan-laek. Ami hakarak rona Ita-nia liafuan, identifika ho Ita, moris tuir valór sira ne'ebé Ita propoin, la'o ho Ita iha dalan domin no saran-an nian ne'eb'e lori ba moris rohan-laek.